


TEZAUŢ LITURGIC

25 DECEMBRIE

ACATISTUL NAŞTERII DOMNULUI



MOSCOVA, 2000



Акафист

Рождеству Христову

Кондак 1

Избра́ннии от всех пле́мен и наро́дов в язы́к свят, ца́рское свяще́ние, сы́ны Све́та и насле́дницы Ца́рствия, прииди́те возра́дуемся Го́сподеви и Спаси́телю Бо́гу, в Вифле́еме Ро́ждшемуся и нас ра́ди пелена́ми повива́емому, с волхвы́ и па́стыри поклони́мся, а́нгельскую вси в весе́лии пою́ще песнь: Сла́ва в вы́шних Бо́гу и на землѣ́ мир, в челове́цех благоволе́ние!

Икос 1

А́нгелом недове́домую, пресла́вную та́йну Твоего́ смотре́ния на ко́нec веко́в открыва́я, Христе́, я́ко Младене́ц в я́слех безслове́сных возлежи́ши и во убо́зем верте́пе ми́ру явля́ешися, Сло́ве Бо́жий, безнача́льне. О́ле стра́шного та́инства! О́ле Бо́жия снисхожде́ния! Тем у́бо со стра́хом и ра́достью взира́юще на неисповеди́мое исто́щание Твое́, си́це Тебе́ зове́м:

Сла́ва Тебе́, Све́те Тѣхний, от Де́вы ми́ру возсия́вый;

сла́ва Тебе́, А́нгелов Ра́досте, во страну́ пла́ча прише́дый.

Сла́ва Тебе́, Нача́льниче ми́ра, спасе́ние благовести́вый;

сла́ва Тебе́, Сы́не Бо́жий, Собо́ю то́е
устро́ивый.

Сла́ва Тебе́, Сия́ние О́тчия сла́вы;
сла́ва Тебе́, от тьмы́ в чу́дный Твой свет
челове́ки призва́вый.

Сла́ва Тебе́, Иису́се, Сы́не Единоро́дный, на
зе́млю снизше́дый;

сла́ва Тебе́, Иису́се, восхо́д земноро́дным на
Не́бо устро́ивый.

Сла́ва в вы́шних Бо́гу и на землі мир, в
челове́цах благоволе́ние!

Кондак 2

Ви́дев нищету́ и поги́бель ро́да челове́ческаго,
всемо́гущее светоза́рное Сло́во Бо́жие, ти́хому
молча́нию содержа́щу вся и но́щи
преполовля́ющейся, с Небесе́, от Престо́ла
Ца́рскаго, во юдо́ль земну́ю поги́бельную снйде,
во спасе́ние пою́щих Ему́: Аллилу́иа.

Икос 2

Разуме́в ду́хом проро́к Авваку́м пришество́ние
Твое́, ужа́сса вопия́ше: Го́споди, услы́шах слух
Твой и убоя́хся, разуме́х дела́ Твоя́ и ужасо́хся!
Мы же сбы́тие тайны́ сея́ зря́ще, Вифле́ем
че́ствуем и я́слем Твоим покланя́емся¹, зову́ще:

Сла́ва Тебе́, Бо́жия Прему́дросте и Си́ло;

¹см. свт. Григорий Богослов «Слово на Богоявление».

сла́ва Тебе́, омраче́нную не́мощь на́шу
посети́вый.

Сла́ва Тебе́, повива́ющему мгло́ю зе́млю и не́бо
о́блаки,

сла́ва Тебе́, нас ра́ди пови́тому пелена́ми.

Сла́ва Тебе́, одева́й красо́тою крѣ́ны се́льныя,
сла́ва Тебе́, наготу́ на́шу облеки́й во оде́жду
нетле́ния.

Сла́ва Тебе́, зрак раба́ прие́мый;

сла́ва Тебе́, от ра́бства страсте́й нас
свободи́вый.

Сла́ва в вы́шних Бо́гу и на землі́ мир, в
челове́цах благоволе́ние!

Кондак 3

Си́лы Небе́сныя ве́лиим гла́сом восхва́лиша Тя,
све́тлое Со́лнце Сла́вы, восходя́щее от
де́вственнаго О́блака и просвеща́ющее мир за
милосе́рдие безме́рное, и в весе́лии воспе́ша:
Аллилу́иа.

Икос 3

Име́й престо́л не́бо и подно́жие зе́млю ме́ста
ни еди́на обре́те во оби́тели, те́мже Чи́стая Де́ва,
Ма́ти Твоя́, сокрыва́ет Тя от хла́да но́щнаго в
худе́м верте́пе и во я́слех ско́тиих полага́ет Тя,
Сокро́вище го́рняго ми́ра и Зижди́теля
вся́ческих. Дивя́щаяся милосе́рдию Твоему́, си́це
Тебе́ зове́м:

Сла́ва Тебе́, по нам неизрече́нно обнища́вый,
 сла́ва Тебе́, неизче́тно нас обогати́вый.
 Сла́ва Тебе́, на́шу немо́щь восприе́мый;
 сла́ва Тебе́, нас си́лою Твое́ю облеки́й.
 Сла́ва Тебе́, хлад но́щный претерпе́вый;
 сла́ва Тебе́, тепло́ю Твоея́ любве́ мир
 согрѣ́вый.

Сла́ва Тебе́, не имѣ́вый, где главы́ подклони́ти
 на землѣ;

сла́ва Тебе́, преклони́вый небеса́ схождение́м
 Твои́м.

Сла́ва в вы́шних Бо́гу и на землѣ мир, в
 челове́цах благоволе́ние!

Кондак 4

Бу́рею сумни́тельных помышле́ний мятѣ́тся
 И́род и вся Иерусали́ма с ним; ца́рие же
 восточ́нии Тебе́, Царю́ царей́, да́ры избра́нныя
 прино́сят. С ни́миже и нас сподо́би Тебе́
 кла́няться ду́хом и и́стиною и приноси́ти Тебе́
 ве́ру я́ко зла́то, чи́стое жити́е я́ко лива́н, любо́вь
 же я́ко сми́рну, зову́ще: Аллилу́иа.

Икос 4

Слы́шав Ада́м первозда́нный глас Го́спода
 сла́вы, ходя́щаго в рай, стра́хом скры́ся, убоя́вся
 лица́ Твоего́. Ны́не же Ты, Спа́се, сокрыва́еши
 под брѣ́нным покрóвом стра́шную сла́ву Твоего́

Божества́ и низхо́диши на зе́млю, зрак Ада́мов
нося́, взыска́ти поги́бшаго, вопи́юще Тебе́:

Сла́ва Тебе́, с Небесе́ до́лу низше́дый;

сла́ва Тебе́, челове́ка горе́ вознесы́й.

Сла́ва Тебе́, беззако́ния моя́ на Себе́
возложи́вый;

сла́ва Тебе́, язвою Твое́ю мя исцели́вый.

Сла́ва Тебе́, приобщив́ыйся моея́ плоти́;

сла́ва Тебе́, приобща́й мя Твоего́ Божества́.

Сла́ва Тебе́, студи́ную наготу́ челове́ков ри́зою
Твоея́ сла́вы покрыв́ый;

сла́ва Тебе́, глад ду́ши утоля́й сла́достью
трапезы́ Твоея́.

Сла́ва в вы́шних Бо́гу и на землі́ мир, в
челове́цах благоволе́ние!

Кондак 5

Боготе́чная звезда́ с высоты́ показу́ет Тя,
изда́вна предвозвеще́нную мы́сленную Звезду́,
от Иа́кова возсия́вшую. Сподоби́ и нас, ко
убо́гому верте́пу со звездосло́вцы прите́кших,
узрети́ очище́нными очесы́ ду́ши па́че звезд и
со́лнца просия́вшую сла́ву Твоего́ Божества́ и
вспе́ти Тебе́: Аллилу́иа.

Икос 5

Прови́дев изда́леча день Твой, Христэ́, праотец
Твой Авраа́м возра́довася ду́хом; мы же ви́дяще
Тя, Све́та невече́рняго, на рука́х Де́вы, Ма́тере

Твоея, яко на престоле почивающа, радостно
сретаем Тя пении сими:

Слава Тебе, млеко́м Неискусомужныя
питаемый;

слава Тебе, пита́й всяческую тварь.

Слава Тебе, Сы́не Де́вы, Емману́иле, О́троча
младо;

слава Тебе, Бо́же Превечный, Отче будущего
века.

Слава Тебе, на плещу́ херувимов носимый,

слава Тебе, нас ради во ясли возлегий.

Слава Тебе, на земли́ младенству́яй;

слава Тебе, нас ча́да Бо́жия содева́яй.

Слава в вы́шних Бо́гу и на земли́ мир, в
челове́цех благоволе́ние!

Кондак 6

Пропове́дует ми́ру ми́лостивое Твое́
прише́ствие проро́к И́лия Фесви́тянин, тому́ бо
на Хори́встей горе́ яви́л еси́ тихое сия́ние Твое́я
сла́вы; и́бо не в бу́ри, ни во огни́ ниже́ в
трясе́нии, но во гла́се хла́да то́нка соше́л еси́ на
зе́млю, Го́споди, просвеща́я и спаса́я вся
зову́щия: Аллилу́иа.

Икос 6

Воссия́ иногда́ свет Небе́сный па́стырем
вифле́емским, творя́щим стра́жу но́щную о́
стаде сво́ем и бдя́щим, те́мже и мы в но́щи

житія́ сего́ лѣности сон отрясѣм, в молитве
 трезвя́щися, да с па́стырьми зрите́лие сла́вы
 Спа́са ро́ждшагося яви́мся и та́ко Ему́ воззовѣм:

Сла́ва Тебе́, Хлѣбе живо́тныи, всех ду́ши
 пита́й;

сла́ва Тебе́, от гла́да смѣртнаго мир избавля́й.

Сла́ва Тебе́, Гро́зде Божѣ́ственныи, вино́ но́вое
 источа́й;

сла́ва Тебе́, жа́жды грехо́вныи мир изыма́й.

Сла́ва Тебе́, свѣ́тлое Со́лнце правды и свѣ́те
 Исти́ны;

сла́ва Тебе́, тепло́тою Ду́ха зе́млю животворя́й.

Сла́ва Тебе́, Небе́сныи Дождю́, ороша́й лице́
 земли́;

сла́ва Тебе́, весну́ благода́ти мі́рови да́руй.

Сла́ва в вы́шних Бо́гу и на земли́ мир, в
 челове́цех благоволе́ние!

Кондак 7

Хотя́ исправи́ти горды́ню перво́зданнаго
 челове́ка, смири́л еси́ Себе́ Сама́го, Сло́ве Бо́жий,
 до я́слей и смѣ́рти крѣ́стныи, о́браз нам дая́, да
 вси, обра́щающии се́рдца своя́ к Тебе́, облеку́тся
 в ца́рское одея́ние смире́ния Твоего́ и
 возоблада́ют над стра́стьми и похотьми́, Тебе́,
 Царю́ вся́ческих, зову́ще: Аллилу́иа.

Икос 7

Дивную тайну воплощения смири́вшагося
Бо́га воспева́юще днесъ, прииди́те, возвы́симся
от земныхъ страсте́й, чи́стою мы́слию присту́пим
и припадём Богомладенцу, в я́слех лежа́щему, во
умиле́нии зову́ще:

Сла́ва Тебе́, на землѣ рождѣйся;

сла́ва Тебе́, ми́ру дарова́вый возрожде́ние.

Сла́ва Тебе́, повеле́нием ке́саревым
написа́выйся с рабы́;

сла́ва Тебе́, в Кни́гу живота́ на Небеси́ имена́
ве́рных Своихъ вписа́вый.

Сла́ва Тебе́, Соде́телю, Емуже́ горе́ служат
со́нми А́нгел;

сла́ва Тебе́, послужи́ти пришѣдый всеро́дному
Ада́му.

Сла́ва Тебе́, Не́бо с землею соединѣ́вый
схожде́нием Твои́м;

сла́ва Тебе́, Бо́га с челове́ком прими́ривый
Рождество́м Твои́м.

Сла́ва в вы́шних Бо́гу и на землѣ́ мир, в
челове́цех благоволе́ние!

Кондак 8

Стра́нна и пришельца́ Бо́га ви́дящи на землѣ́,
устрани́мся су́етнаго ми́ра и взы́щем всеме́рно
Небе́снаго на́шего Оте́чества, благода́ть, и мир и
ми́лость всемъ пришельству́ющим на землѣ́ у

Сы́на Бо́жия прося́ще и воспева́юще Ему́:
Аллилу́иа.

Икос 8

Весь был еси́ до́лу в я́слех, непости́жимо
Го́споди, горе́ на Престо́ле со Отце́м седи́й.
А́нгели воспева́ху Тя́ я́ко Преве́чнаго Бо́га,
челове́цы же зря́ху Младенца́ повита́, мы же
убо́зии прино́сим Ти слёзы уми́ления, си́це
глаго́люще:

Сла́ва Тебе́, недр Оте́ческих не отступивый;
сла́ва Тебе́, с до́льными челове́ки неизре́ченно
поживый.

Сла́ва Тебе́, непристу́пную сла́ву Твоего́
Божества́ сокрывый;

сла́ва Тебе́, присту́пающия к Тебе́ грешны́я не
отри́нувый.

Сла́ва Тебе́, Исто́чнице чистоты́ и свя́тости;
сла́ва Тебе́, с мыта́ри и грешни́ки вече́рявый.

Сла́ва Тебе́, блу́дная ча́да, изда́леча зря́, с
любо́вию сретая́й,

сла́ва Тебе́, вся с покая́нием приходя́щая в лик
друго́в Твои́х вчиня́й.

Сла́ва в вы́шних Бо́гу и на землѣ́ мир, в
челове́цех благоволе́ние!

Кондак 9

Вся землѣ́ богáтство любве́ Твоея́ позна́,
Иисусе́ Всецарю́, егда́ Себе́ Сама́го я́ко

Младѣнца грѣшному міру во очищѣніе даровал еси и в Жертву предуготовал еси. Сего ради роды родов, спасеннии пришествіем Твоим, во веки благодарственне зовут Ти: Аллилуиа.

Икос 9

Ветія многовещанныя недоумѣют воспѣти недомыслимое и неизреченное Рождество Твое: кий бо язык, Ангельскій или человѣческій, возглаголет сию бездну милости Твоея, Спасе? Приими убо благодарныя слѣзы земнородных, искупленных Твоею Кровію, Тебѣ припадающих и вопиющих:

Слава Тебѣ, изобретый всяк путь художества²;
 слава Тебѣ, соединивый с человеки Божество.
 Слава Тебѣ, странно во Своя пришедый;
 слава Тебѣ, устранившихся от Бога на Небо призывавый.

Слава Тебѣ, вертеп обитель Себѣ избравый;
 слава Тебѣ, Небесныя обители людем уготовавый.

Слава Тебѣ, грех міра вземляй и обремененныя к Себѣ призываяй;

слава Тебѣ, немощи человѣческия исцеляяй и труждающихся упокоеваяй.

Слава в вышних Богу и на земли мир, в человецех благоволеніе!

² см. (Вар. 3; 37), паремия Навечерия Рождества Христова (час 3-й).

Кондак 10

Спасѣ́ние соде́лал еси́ ми́ру стра́нным
исто́щанием Твои́м и врата́ милосе́рдия Бо́жия и
вы́шнее Ца́рствие отве́рзл еси́ соше́ствием
Твои́м: отны́не бо сы́нове чело́вечести́и о́бщницы
А́нгелом бы́вають и ра́дующеся ле́гкою сте́зю в
Небеса́ восхо́дят, немол́чно зову́ще: Аллилу́иа.

Икос 10

Царю́ Преве́чный, рождѣ́йся на земли́ чело́века
ра́ди, Христе́ Бо́же! Покажи́ ны досто́йны Твоего́
осия́ния, даждь нам во вся дни́ живота́ на́шего
помина́ти Твоя́ благоде́яния и чи́стым се́рдцем
воспева́ти Тебе́ сицевая́:

Сла́ва Тебе́, Царю́ веко́в, вы́шнее Ца́рство
ве́рным отверза́яй,

сла́ва Тебе́, Па́стырю до́брый, заблудших овец
на па́жить цветоно́сную призыва́яй.

Сла́ва Тебе́, И́мый ключ Дави́дов, Еде́ма врата́
нам отве́рзый;

сла́ва Тебе́, Ключу́ Боже́ственный, отверза́яй
сердца́ к прия́тию благода́ти.

Сла́ва Тебе́, Ма́нно Небе́сная, в пусты́ни жити́я
сего́ пита́ющая;

сла́ва Тебе́, Иису́се Бо́же, Но́вый Израи́ль в
зе́млю обетова́нную вводя́й.

Сла́ва Тебе́, А́гнче Бо́жий, на заклáние в мир
прише́дый;

сла́ва Тебе́, сме́ртию Твое́ю живо́т нам дарава́вый.

Сла́ва в вы́шних Бо́гу и на землі́ мир, в челове́цах благоволе́ние!

Кондак 11

Песнь благодарёния приими́ от нас, Сло́ве Бо́жий, и сподо́би нас, до́льних, сре́сти чи́стыми дея́ньми и подъя́ти Тя, Христа́, плоти́ю младе́нствующа, Христа́, во́лею обнища́вша, Христа́, нас ра́ди на зе́млю низше́дша, Его́же горе́ пою́т непреста́нно А́нгели Бо́жи, зову́ще: Аллилу́иа.

Икос 11

Све́том оде́йся, я́ко ри́зою, безсла́вен и наг в мир сей вхо́дит, и Бо́жие Сло́во, нося́щее вся глаго́лом си́лы Своея́, немотствую́щий Младене́ц зри́тся на землі́, Ему́же покланя́ющесе вси глаго́лем:

Сла́ва Тебе́, Сло́ве, во я́слех немотству́яй;
сла́ва Тебе́, доброте́ молча́ния и сло́ва науча́яй.
Сла́ва Тебе́, Животе́, пові́тый пелены́;
сла́ва Тебе́, плени́цы сме́ртныя разреши́ти
гряды́й.

Сла́ва Тебе́, благовести́ти ни́щим прише́дый;
сла́ва Тебе́, сокруше́нныя се́рдцем исцели́вый.
Сла́ва Тебе́, пропове́дуяй слепы́м прозре́ние;
сла́ва Тебе́, отпу́ща́яй сокруше́нныя во отра́ду.

Сла́ва в вы́шних Бо́гу и на землѣ мир, в
челове́цах благоволе́ние!

Кондак 12

Благода́ть спаси́тельная всем челове́ком яви́ся
и всех изба́вление приспе́: сла́вы бо Госпо́дь
низхо́дит на зе́млю ми́лости ра́ди. Го́ры и хо́лми,
поля́ и де́бри, челове́цы и А́нгели, вся́кое
ды́хание и тварь, весе́лия Божество́ннаго
исполня́еми, воскли́кните сретáюще Того́:
Аллилу́иа.

Икос 12

Пою́ще ве́лие та́инство Твоего́ вочелове́чения,
Го́споди, мо́лим Тя, раба́ Твой, егда́ приидеши
па́ки на зе́млю с си́лою и сла́вою мно́гою,
помилуй и спаси́ всех, чту́щих Твое́ е́же от Де́вы
неизрече́нное Рожде́ство и любóвию зову́щих Ти:

Сла́ва Тебе́, на землѣ воплоти́выйся
благовести́ти заблуждши́м;

сла́ва Тебе́, до а́да снизше́дый взыска́ти
падших.

Сла́ва Тебе́, сокрови́ща благода́ти Твоея́
открывáяй;

сла́ва Тебе́, удо́бен путь к Небеси́ показу́яй.

Сла́ва Тебе́, вода́ми Креще́ния естество́
челове́ческое обнови́вый;

сла́ва Тебе́, Божество́нными Та́йнами си́е
обожи́вый.

Сла́ва Тебе́, ве́рныя по исхо́де от жити́я в
Ца́рствие Твое́ вводя́й;

сла́ва Тебе́, весе́лие Иеруса́лима го́рняго во
ве́ки ве́ков подава́яй.

Сла́ва в вы́шних Бо́гу и на землѣ́ мир, в
челове́цах благоволе́ние!

Кондак 13

О́, неизсле́димая и неизглаго́ланная Бе́здно
Любве́ и Щедро́т, младе́нствуяй плото́ю Иису́се!
Приими́ приноси́мое Тебе́ убо́гое сие́ моле́ние и
не возгнуша́йся возле́щи в я́слех безслове́сныя
души́ моея́. О́, Све́те ми́ра незаходи́мый!
Просвети́ мя сия́нием Твои́м, прииди́ и оби́тель в
се́рдце моём сотвори́, да во ве́ки пою́ Ти:
Аллилу́иа.

Молитва

О́, Сладча́йший Иису́се, Сло́ве Бо́жий, Сы́не
Де́вы, Тебе́ нас ра́ди на землѣ́ явля́шагося вся
тварь испове́да бы́ти Творца́ и Влады́ку
вся́ческих, во́лны морскія́ смиря́хуся под но́зе
Твои́, умолка́ху ве́тры Твои́м повеле́нием,
ме́ртвии сло́вом Твои́м возстава́ху, со́лнце Тебе́
умира́юще поме́рче, земля́ о Тебе́ потрясе́ся,
не́бо Тебе́ возходя́щу отве́рзеса. Тем у́бо и ны́не
мо́лим Тя, раби́ Твои́, Влады́ко, ути́ши вся на́ша
помышле́ния и чу́ства се́рдечная, запре́ти
волне́нию страсте́й, возста́ви ны́ от сме́рти

грехо́вныя, сотвори́, да пред свѣ́том любви́ Твоея́ померкнут нам вся сла́вная и красна́я су́етнаго ми́ра, да потре́сутся трѣ́петом ду́ши на́ша и отверзутся сердца́ при́яти Тя Невече́рняго Свѣ́та, просвеща́ющаго вся́каго челове́ка, гряду́щаго в мир. Сподо́би ны́не изы́ти любви́ю в срѣ́тение Тебе́, низходя́щему на зѣ́млю нас ра́ди, и в день исхо́да на́шего от вре́меннаго жити́я сего́ устря́щи нас, восходя́щих от земли́, милосе́рдием Твои́м, приими́ в Небе́сныя Твоя́ селѣ́ния и сотвори́ прича́стники сла́внаго Ца́рствія Твоего́, да со А́нгелы святы́ми поѣ́м и славим Тя, Спа́са душ на́ших, со Безнача́льным Твои́м Отце́м и с Пресвяты́м Ду́хом, Еди́наго в Тро́ице Бо́га, Ему́же подоба́ет вся́кая сла́ва че́сть и поклонѣ́ние во ве́ки ве́ков. Ами́нь.

Текст акафиста утвержден решением Священного Синода от 26 декабря 2019 года (журнал № 163).



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

I

**НОВОЕ
* НЕБО**